



# Chamna Lalpa

**K**umtawp December tha Lalpan ei pui tung to kit ta, mitin lungthim chu Christmas in dim ding ahi tai. Mi khenkhathe chu Christmas gim a hung nam tak ziaka Christmas Carol ding buai in i buai tau a, zia dinga chun kochuamte'n Christmas Carol programme siam in nuam tak in Chamna Lalpa piani thillawk in hun nuam takin i mang ui. Khenkhathe chu Ju kham kawm kawm in Christmas Carol i bawl kit uh ahi. Khrista neite hi henna, neilote hijiang leule Christmas chu a nawp thei pen a matgaw chiatte ihu ahi. Zia chu ahi zia in Christmas ah Jesu Khrista pianni ahijiak in “Chamna Lalpa” ti thupi hi chawm chan ala ngaitua khawm hitiu.

La phuaktu chun “Chamna Lalpa a piang Beth-lehem ah” ti in a la phuak ah, Christmas phat leh I sau ah, I lim mama sek ui. Ahinla kum bang zat zat ahem Christmas hung mang ta Chamna Lalpa piang lawm ah kipak tak ah Bawngte, Vawkte that ah I mat zing lai un I insung, I kochuam, I kkuatang, I gamsung ah Chamna a um theilo hi bang zia ahi diam? Chamna Lalpa hi Beth-lehem ah I pian sak ua ei mau ah I pian saklo zia un ahi diam? Chamna Lalpa Beth-lehem ah piang lawn ah um zing I hui chun mi vangsia hitiu.

Chamna Lalpa chu Beth-lehem in apiang zota,

tuhin nang leh kei lungthim sunggil in apiang nuam ta ahi. La phuaktu ma chun “Aw Lalpa Jesu hung in la nang an ka lunggil in mun a um” ti in ala phuak ah, ale nang leh kei in I lunggil u Lalpa pianna ding in I awt ngam diam uh? Lalpan a pianna ding in I lunggil uh eiddawn ahi.

Chamna ti ahin Pathian tawh Mihing kikal ah Chamna bep hi Pathian in atup ahi puai. Chamna Lalpa hung pian hin Mihing kal ale Chamna aum theina ding ah hung piang ahi (Luke 2:14). Pathian leh Mihing kal a Chamna nasep semding ah Christa hung ahin, I mihing chanpi tawh eima kikal ah Chamna nasep chu ei-

mau Christa Chamna nasep dawngtute sep ding ahi. I mi-hing chanpi tawh kicham thei lo ihiu chun Christa Chamna Lalpa chu eimau ah piang nai-lo leh Chamna Lal in eimau ah vaihawm nailo tina ahi.

Lalpa ti hin Leng/ vaihawmtu tina ahin Cham-na Lalpa eima ah a um chun Chamna chu eima Mihing dawi ziak hilo maleh inei a ngai ahi. Christmas diktak mangtu Christa ama ah piang sakte chun ama ah vaihawmtu hung piang dawi gual bawlo theilo ahi ziak in Chamna anei sek uh ahi.

Tuni hin ngaitua hitiu, Chamna Lalpa chu ei mau ah piang in, ei mau hinkhua ah vaihawm tun I pansak nau em? Insung ah bang ziak ah cham-na/kihotheina umlo ahem, mo leh talpi bang ziak ah kicham theilo a, nu leh pan bang ziak ah kicham theilo I hiu em? Khawtang ah kimudana leh kigensiatna bei theilo ah, ko-chuam ah kigensiat tuana leh kimuda tuana'n vaihawm zing ah lai un Chamna Lalpa chu ei mau lak in apiang tak tak na diam?

Tulai

Christian

hinkhua i mat danteu hi i thil ahi chun Christa neitute hinkhaw man dan diktak ding chu hilo leh a kilawm ta ahi. A genthawi ahin i hechiat un, himaleh a tak gam ah juizolo i bang tau ahi. Chamna Lalpa a apiang tai ti in tangkopi jing maleu hin uh le mai gentute'n le chamna midangte tawh i kikal un i nei diak puau. Eimau thiamlona kihelo in midangte thiamlona muthei leh hethetei ihiu ahi. Zia hin Christa cham-na Lalpa i neilo dan uh a kilang nasa diak sek ahi.

Bible chun, "Khrista ah chun thilpha hidinga siam ah um in.." (Eph. 2"10) ti imu a, Khrista neitu Christiane chu thilpha sem dinga Khrista'n ei tatdawte leh chawsakte i hiu ahi. Christa neitute chu thilpha bawl ding chu a taksaplo hial ding uh ahi dan Bible apat hin a hiatthei ahi. Himaleh, tulai gingtute hindan hi ngaitua in Khrista'n ei tatna hin le umzia neilo ah thilpha sem ding leh bawl na ding lam ahin puakgik bangma neilo i bangjo tau ahi.

Christiane lak ah thilpha bawl ding daltu liantak mai khat chu ei ma siatna kihiatlo kei ah midangte siatna hiat

ten tenna hi ahi.'Thilhawi leh thilpha bawl ding chu ahi tho nai, ahiajiak in ama kha le jia gual kha ahia' ti hi ahi. Zia gual hinkhua neitute hin Chamna lal Christa chu a nei puau ti a kilang ahi. Christa neitute chun midang siatna ziak in a thilpha bawl ding a thul ngai pua, Christa'n ama ngei chu a thisan ah a tatsa ahi dan a kihia bawlo theilo gual in a ngai sek ahi.

Christian kiti hi, Christa ama ah piang ah, Christa'n a chung ah vai ahawm ding ahi. A vaihawmlo ding in vai ahawm phatle buaina atung sek hi, tulai ah I buainau zosia hile Christa vaihawmlo ah miten vai I hawm sek ziak uh ahi pen hi. Mimal hinkhua phalo sandanglam theina leh Insung, Kochuam, Khawtang, Gamsung ah Chamna umthei na ding ah lampi umsun chu Christa Chamna Lalpa eimau ah pian sak leh I chung ah vaihawm sak ah a nung zui hi ahi. Ama ah Christa pian nate chun Chamna adawi ui, aziak chu amau chung ah thuneitu chu Chamna Lalpa ahi tak ziak in. Amau chun Cham anawp ziak un athuak un, a kingai

tawm un, chung nun a chu ngai puau Zia gual mite chu Insung, kochuam, Khawtang leh gamsung ah ding ah Chamna siamtu ahi sek ui. Chuleh Christa chanchinpha a hiatteu chun amau sunggil a lua jing a tichun, nisin in chamna lungthim a nei jing ahi.

Tulai Khawvel in amamaw pen chu Chamna ahi. Mimal, Insung tin, Kochuam leh Khawtang inle I mamaw chiat ui, zia Chamna chu hawl in mitin eimau theitawp sua chiat in ipang ui, ahinlah, Chamna leh lungmuanna diktak chu ama ah Chamna Lalpa pian nate bep chun anei un, zia Chamna chu ahi khawvel in a mamaw chuh!

Christa chamna lal chanchinpha chu midangte piak sawn ding hi I mawpuak nau ahi, ziaziaakachun, eiman le i nei a ngai ahi. Eima ngei inle i neilo chu midang kipetheilo ahi ziak in tuchung Christmas ahin mudawk leh chang ah midang le musak/piasawn thei ding in Lalpa ei malsawm chiat a hen.

.....xXx.....

## CHAMNA LAL JESU KIPAT IN LEICHUNG AH LEMTHU LENGTA HEN (Luk 2; 14).

~Rev. Dr. Hangpi Manlun

### 1). Thupatna.

**A**wle u leh nau, lawi leh pai leh nu leh pate haw Pa Pathian mapuina leh ven-bitna jiaak a, tukum Khrismas melmu thei ding a i um tak ziaak un Pathian chu lopina changta hen! Tuchung ahin i thupi ding un, ‘Lem thu lengta hen’ ti thu ahin holim khawm leuhin i nuam ahi. Chuleh lemna, muanna leh thamuan-na hi Greek pau in ‘eirene’ atiu ahi. Thuthung Thak ah 100-veibang achuang ahi. Chuleh lemna chu Pathian hina leh mi zia ahia, ajiak chu, ‘lemna Pathian’ ahiziak in ahi (Rom 15;33; Philippi 4:9). Chun, ingakla ma mau leh apianni ilawp uh Jesu le lemna Lalpa (Prince of peace), ahi.

Ziaban ah, leichung ah lemna leh muanna a umtheina ding in, UNO hial inle theit-awp sua in lemna leh muanna umtheina ding in pan ala lau ahi. Ahin leichung ah lemna leh muanna tak tak a umthei

puai. President Jackson in, “I gam in lemna a daw i a, mip-ite’n le i daw i chiat ua, i solkar inle a daw i a, la presidentpu un le ka daw i a, zia beplo ah chun i melma/galte nasan un le a daw i a, bang ding a lemna dawichiat kilem sukmai ding hinapi, bangtia i kilemthei puau a” ati a gen dik ma ma ahi. Chuleh leichung ah lemthu lengta hen ti thu hi bang tiang in alawtingta diam le? Galvan a kisiam tam deu deu a, lem thu sang in kilemlo thu hi aleng deu deu a, kilemlo uh hi ikilemna uh hileh akilawm hi. Awleh, lemna i pawimawna uh chuam chuamte vak enkhawm hitiu.

### 2). Eima leh eima ikilem masak ding uh ahi.

Awle amasapen in mani- le- mani ikilem masak ding uh ahi. Khawvel a milau umpente ahileh mani-leh-mani kilemtheilo, chantawk a lungkim theilo leh kingaisiate ahiu. Amau in malam ah

kinepna ding a neilo ziak un, kingaisia in mani-leh-mani a kithat ngam sek ui. Ziakachun, eima-leh-eima ikilem theina ding un ilungthim sung ah lemna lal (Jesu) piangsak hitiu.

### 3). I nupan kal ah lemthu lengta hen.

Tulai nu-leh-pa tam-takte chu i kingailai un, kilungsiat ma ma kisa in “love is blind” lungsiatna mithum ti'n i mizia leh ihinate le kihemanlo in i kicheng pai ngal un. Ahin ikichen phat le lungsiatna mithum kha hung vak kelkul in, ka ginchat la bang puai, tite in i kinung sik in i kinaklaw sek ui. Khenkhatte ngel la i kingai lai un kilungsiat ma ma kisa'n nu-leh-pa leh kochuam dan nangawn ngaklo jen a kigupawl le i tam ui. Tulai ji-leh-pawsal kikal a kilemlona umsaktute chu, thangsiatna jiake, kiginlelna jiake, chanding guala chanzawlona jiake, sum-leh-pai jiake, leh adangdang jiake'n nupan kal ah kilemlona a piang nuam ma ma ahi. Zia gual nupan hinkhua nuamlo taka mang mite kiang ah lemthu lengta hen tia van angelte lasak chu a tak tak in hung guitungta hen!.

### 4). Inkuan sung ah lemthu lengta hen.

Tulai Khristian inkuan tampite melma chu Setan nasep jiake a kituaklo tam tak i umthei ui. Khenkhatte kituaklona ziake chu khamthei drugs, sum-leh-pai, zu-leh-sate ban ah tek-leh-mo kituaklo, pa leh cha kituaklo tite in i pumdintau. Zia gual vangsiatna tuak Inkuante kiang ah Lalpan lem thu lengta hen eiti ahi. Ziakachun, khristian inkuan kitite'n Jesu hung pianni hi bangtin i lawm ding ihu em le?

### 5). In sak inthangte kikal ah lemthu lengta hen.

Tulai Inte ikinai deu deu un, i lungthimteu a kigamla deu deu a bangtai. Ziaban ah, duamna leh mani masialnate jiake in Insak Inthangte mun-le-mual kichu in kituaklo hinkhua ah i luttau ahi. Khenkhatte ngel in la Inkim inkiangte mun-leh-mualte lakpiak la a bei diak puai. A diak in, Lamka khawpi ah ihawktuiteu inle aluanna ding nangawn helo khawp in a umta ahi. Ahin, upaten, migam kekpiaktute chu a luang uh lupna ding tiang a kekphat

ua le a thilaw sek ui, a kiti ahi. Thupil in, “La unau la pianpi mun gamla taka um sang in la Ingeite chu nang ading in la suapite ahi” ati ahi. A gen dik ma ma hi, nawp leh da tuakta lenle i unau mun gamlapi a umte sang in i Insak Inthangte chu ei delmasa pen dingte ahiu hi. Ziakachun, nidanglai ipi, iputen Insak Inthangte tawh kituaklo sangin khaw sagi do ding ateljaw sek ui. Chuleh Bible in min lachung ah a bawlding la dawi gual un michung inle bawl un atilai in, ei un ei chung a min ei bawl ding i dawiloteu michung ah ibawlgaw sek ui. (Matt. 7;12).

#### **6). Kochuam sung ah lem thu lengta hen.**

Awle, kochuam hi Lalpa Jesun a thisan mantam taka a chawksa leh a tudingte ihu ahi. Ziakachun, taksa ah kipawlkhawmna mai mai ahi pua, thagaulam kipawlkhawmna mun ahi hi i hiatmillo ding uh ahi. Tulai kochuamte hi a kituakpente umkhawm kihilo in, a kituaklo pente umkhawm a kibangta ahi. A diak in kum 2000 nungram ah kua kochuamte hijiang leule kikhenna leh kituaklona kochuamte lakin

a nsa ma ma ta ahi. Melmapa setan ngei in le kochuam zosia kituak taka Lalgam na isepding uh a thangsia hingei ding ahia, kochuam lian leh neute lakin le kituaklona a nasa ma ma ta ahi.

Chuleh kochuam sung ah i kituaklona jiaктеu ahileh, lamkai kichuna jiaкте, mani thulo thusaklonate, be-leh-phung a kihui chuamnate, lawi-leh-pai ah kihui chuamnate, leh adangdangte jiaкте ahinuam mama ahi. Zia gual ah sual nasepnate haisan in i kochuam sung ua lemna leh muanna hung tung chiatta hen.

#### **7. I ). Khawtang leh i gam vaihawmnate ah lem thu lengta hen.**

Tulai i khawtang leh igam vaihawmnate ah kituaklona a nasa mama hi. Banah, i chenna gam ah lemna leh muanna nasatak in i pawimaw'u ahi. Ziaban ah, ei uh hi kawle-leh-vaite gual in chil-leh-nam kikhenna neilo maleu hin mihausa leh a gentheite kikal ah nasatak in kidaidanna alian deu deu hi. Chun, isum hawl nau un le itenate/buknateu adik tak tak nam? Bible in “Tena diklo chu Lalpa mit-

mu in thil kidak um tak ahia, adik chu akipakpi ahi” ati ahi. (Proverb 11:11). Migentheite satan leh nek dingte le a chang ding ua kilawmte achang nau em? Ziabanah, vaihawmtute, milian milal leh thuneite khun i vaihawmnateu ah thudik tawh i vaihawmnau emle? I Bible in “Vaihawmna dik lui gual in luangta hen, dikna chu lui-pi kang ngailo gual in luangta hen” (Amos 5:24) ati hi igam in i taksap khat hi leh akilawmta ahi.

### **8). Atawpna ding in lemna leh muanna igam ua a tuntheina ding in pan ilakchiat ding uh ahi.**

Awleh, a chawmkim in genta len i innsungteu, i khawtang uh, i politicteu ah itidam taktak puau a, a sudamtheipa ikultak jet un i pawimaw chiat uh ahi. I gensa gual un i gam ua lemna-leh-muanna a umtheina ding in kua ahem Israelte leh Pathian kikal a palai na sem? Abraham gual ah igam in ipawimaw takzet hi. Chuleh Scotland gam a halthakna tunna ding a, John Knox in, “Lalpa Scotland gam ei pian, ahilo leh ka hinna la in” ti'n a pauchap gual ah pauchap

dingmi i kul un i pawimaw uh ahi.

Chun, Lalpa Jesu amu taktakte chun mi tawh akilem ding uh ahi. Aziak chu, Lalpa Jesu sung ah lemna leh muanna bukim a um ahi. I Bible un Pilat leh Herodte kha Jesu matsak ding ah akiapiak tua tuana lam ua a tawp in ahung kihotheita mai uh ahi. (Luk 23:12).

A lamdang mama khat chu amau gel a pianthak thu uh imu puau a, ahin Jesu lemna lal akiapiaktua tuana lam ua ahung kihotheita mai uh hi ahi. Ziakachun, tuchung in Lalpa Jesu hung pianna ding ilawpna ding tawh kituak in i hinkhua leh i gam i lei ah lemna leh muanna hungtungta he n!!! i

.....xXx.....

# KHRISTMAS MAT DAN

~By:- Rev.N.Dalla Vaiphei

**P**athian thu awi lim lai ah pi leh pute khan khristmas a mat phat ua leh taksa kisuk limna nek leh dawn nunnop tite bep kha ala mat dan tangpiu ahi. Pathian thugil thutak lam ala sui thuk nailo uh ahi. Ei lawi neulai hun tiang inle, mat dan chuam dang ala ki gel dok nailo chu hi ding ahia, len khawmna hall ah zan khawvak ah nunnop eltol ibawl khawvak thei nak leh khristmas mang lawting gual in ala ki ki ngai ahi.

Tulai hun a hinle ki san danglam na tak tak um thei nailo gual in, nek khawm nunnop, tite bep hi i chiapi pi nalai uh ahi. Mun khen khat vang vang achun mang nuam talua hi ding a hiu a, Jesu umna lam lam le he phalo zen ahsun nitum leh za khawvak vak hial ah mang lawi bang um thei dan ahiu. Pathian thu ah ei sulim ding leh thagauah limna mu ding kinem ah khristmas tun kal ngakla thei gingu a ki tam khel dia aw! Ngaitua kham a ting ahi.

Khristmas sermon thu-pi tak tak pulpit ah genzaw leh ngaithak zaw ahi nung in Pathian thutak i ngaithak teu sudau thei ding zawng ah hall lam ah tawt chavai ah eltol man theilo gam cheng limpi kit zel sek gingu mumal neilo ihi khak

diu alau um ahi.

Chamna Lalpa apiang bethlehem ah tila te lim tak ah isak dip dip lai ua, ning khat ah, zukham, sava ah ki soal lui lui lawi la beilo, akhamlo sia le sum thu zia ah ki na puak veng vung lawi le ki um kit thei nalai, chamna Lalpa lawm ki hi ngal aki chamthei khuk sanle ki umlo, ki ning suk chek chuk ah khristmas mang mai mai kochuam ihi khak ua chun ei u dia hung piang hukdampa Lal Jesu vang a lungthim na ta lua ding ahi.

Bible ah Khristmas mang masa te mat dan leh tuni ei haw mat dan hi tekak leu hin, lunggil tak ah ngaituate din thil tam tak ngaitua daw ziang thei ahi.

## **1.Pa Pathian in:-**

Khristmas hi Pa Pathi-



an in a chapa changkhat neisun ei piakni ahi. Thilpiak lak lak ah chungnung pen Vanlal chapa piak ah i um niu ahi. “Pathian in khawvel a hepi ma ma a, chuti chun, achapa changkhat neisun chu a pe tai.” (Joh.3:16) ti hi khristmas thil tup Pathian lemguat chu ahi.

Pathian in thilpiak in a hepina ahun sulang a, ei unle thilpiak ma in Pathian i hepinau i suklat kit diu ahi. Mangthai te hepina in thilpiak ipediuh ahia, Pathian chanvo dik tak in i pe zing diu ahi. Thil piak hi Pathian tawh a ki lai chinnau ahi. Khristmas hi thilpiak piakni ahi.

## 2. **Mari chun:-**

“Ngaitia, Lalpa suaknu ka hi la ti gual gual in ka chungtung ta hen.” (Luk.1:38) Mari ki piakna zal in huk dampa nausen mihing in ahung piang ahi. Khristmas hi eima thu thu zalenna nikhua hi loin, Lalpa thu dungzui ah ki piak thakna nikhua ahi zaw ding ahi.

Mari nopna pang loin, nausen Jesu chu a sungah kizil a gawpua, anopna ngei angak zaw ahi. Hukdampa Lal Jesu hile nangma nopna pang loin, la sungah hung cheng ziang lo ding ahi. Mari hin suan lam

siam ding hileh, apawsal dingah ki khamasa Joseph hiatpi lo ah nausen Jesu a vopding chu suanlam kham ating ahi.

Ei lawi gual hileh, ka u Joseph tawh hung ki ho tuak phot ingkau, ti in, vansawlichak kiang khankigen ngei ina. Maleh, mari chun suanlam bangma siam loin, “La thu gual gual in ka chung in tung ta hen.” ti in a dawnhu ta, zia chun Khristmas a hung kipan ahi.

“Ka hin nan Lalpa a chawihawi a, Ka thagau le Ka hukdampa a chun a kipak ma ma hi.” ti mari kamsuak hi khristmas nei tu dik tak ten a nei uh ahi. Kam-sung mai leh pawlawng mai ah Lalpa chawihawi, sunggil lam ah Pathian ki chakna him him umlo, a min ah gingtu minpu ihi khak chun khristmas mang mang ziang leu hinle, adiktak khristmas mang kha nailo hikha ding ihu.

## 3. **Joseph:-**

Van lal chapa hungpiang enkawl dingah mi hing dan ah, a pa ding ah guat ah um Joseph hi chu aw! Pathian in a belguat na ma ah athupi him him ahi. I Bible chun “Joseph chu mi diktak ahin, suk

mualpho a nuam pua, aguk in haisan agaw tai.”ti thu hi la ngaitua ngai em? Suk mualpho theina lemchang tak hun ah ki hiatmaw sak aguat mai hihei vei Pathian lungthim sukha ta lua chuh!!

Ei lawi kihi leh, i zi dingah ikhamsa i hiatlo kal ah nau hungvop ta mai chuh! Court ah hek ah suk mualpho ek mai chu abailam ding siat tawh! Mosi dan ale zia gual mi chu suangah selup ding ti ahi ngal a! zia dan zosia chu le Joseph chun a hiatlo hi keilo ahi. Himaleh, Joseph chun lungthim na ngui ngui kawm in a guk in haisan azuk gaw ta ahi. Zia cha chu ei vei Pathian lungthim sukha chuh! Ti chun kuama palai le sawl ngai loin, Pathian ma ma chun a zi mari tawh a kichenna diu a hun siam lem piak ta a hi.

Mi dangte tit lona suk mualpho guat ham ham leh ki suk mualpho tua ding bep lunggul kawm ah khristmas mang ihi khak chun ngaitua um tak hikha ding ihui. Mi diktat ten mi suk mualpho a ching ngai puau a, thil phalo ahiaht te ki lepsan a gaw zaw sek ui.

Joseph thupina dang khat chu en leu hin, “ahin la Chapa anei masia chu a luppi puai.”( matt.1:25)ti hi la ngaitua ngai em? Zi ah nei ta, kicheng zo hita, vanlalcha a sungah um hung pian ma chu nupan hinkhua a matpi puai tina ahi ai chuh! Tha kua, tha sawm, kum khat lam ving veng nausen Jesu chu mi hing thisan tawh su pawlche loin, gin um tak in, ahun enkawl ahi. Pathian mitel chuam haw hin vang danglam na bik a nei ngei uh hilam, ti Joseph hinkhua ahin aki muchian ahi.

Khristmas mang pawlche ah numei pawsal thanghuaina ah nunnop na khristmas ah mang nalai kochuam leh mimal i umkhak ua chun nang leh kei dia hungpiang Hukdampa Lal Jesu lungthim vang na talua ding a hi.

#### **4. Van mipite:-**

Bethlehem dai ah van mipi simsenlo ten khristmas a mat dan ukha la ngaitua ngai em? Van lapawl lopi tak a hun lem ua, “ Chungnung pen ah Pathian lopi henla, Lei ah a dawisak ma ma mihingte kiangah chamna um taken”ti khan belum pute a choklim ma mau

khala maw?

Zia bang lapawl lopi leh nasa kha la pawl dang a um khalo ahi. Maleh entia, ngaithatu kha a tawm na lawm lawm u e!! daiphul lak ah gan chingte bep kha a hiu khala maw? Nang uh kochuam lapawl hi leh mi zia cheng bep lak a khan lasa nuam diam uh? Himaleh, van mipi te khan ngaitha tu tam leh tawm thu a buaipu puau a, Pathian pak leh chawihawi kha a ngaikhawku, lunggil leh titak zet in a sa mai uh a hi. Khristmas hi Pathian chawihawi ni ahia, Pathian lopina puanlat ni a hi bok hi.

### 5. Belampute:-

Belampute hi ngaitua tia, agammi hina neilo te ahiau a, Kaisar Augastas in namtin min zeklut ding ati lai ale pang phalo te a hiu. Maleh, hukdam pa nausen pian thu hil masak pen dia Pathian in alemguat mai hih, alopi him him mai hi. Gamkhat ah leng leh lal te pian thu belampute kihil masa leh kua a hem maksa Ieh nuiza lo ding? Maleh, vanlal cha pian thu vang hil masak pen din Pathian dawisak na a chang uh ahi.

A ziak chu belampute

cha hi maw! Khawvel in bangman ngailo maleu, Pathian tena lam a vang lunggil thiang tho leh mi ki ngaitawm te a hi ziak un, A chapa pian thu hil masak pen ding a chun dawisakna sang pen piak in a um uh ahi. Lunggil ki ngaitawm na hi, khristmas lung thim putna ahia, Lal Herod gual ah chapolungthim tawh mat khak thei ahia, Chapona hi vang khristmas melma liantak ahi sek hi.

Belampute dinmun hi taksa thil tak ah chun awchat um keilo ahiau. Gancha khat hinna sang ale, ahinnau lul lo zaw leh nuainung zaw ahiau. Maleh, entia, “ Lau ki unla ngaitiam u, nang uh din tuni hin hukdampa a piangtai, Lalpa messiah chuh,”ti thu kipak um tak dawng masa tu a pan mai uhi, awchat a um na lawm lawm u e..! La phuak tun “ Cham tadi un belampute zia mun lunglen um hi”. ati vawng vawng mai kha, ala hia maw!! belam pute thu tut khan mi tamtak a sulim hi ngei hi ti hiat thei ngal ahi. Puan ah kituam gan ankuang ah ki sial nausen Jesu kha ava mu phat ua a kipaknau nasat dan kha gen zaw

guallo ahi. Pathian chawihawi leh pak kawm in a chia kit tau ti ahi khah,!

Zia hin i thil hiat teu a tak ah muchet ngei a pawimaw dan ei hil a, Lal Jesu hi thagau mit ah muchian ten vang ki-pakna leh limnan khristmas a mang sek uh a hi.

### **6.Mipilte:-**

Vannuai ah mip-il khawkheng ah kigen sek Chunglam aksi lekhathiam kiti te hi ahiu. Ziate lawi khristmas mat dan hile ngaitua kham a ting ahi. Lal hungpiang chu chunglam aksi umdan a pat in azuk hethei uh ahi. Thilpiak te chawi in Lal hungpiang lawm din sualam apat in a hung veng veng ua, maleh lam kal achun puitu aksi muzing kawm in a mau ngaidan in Lal Herod ki-ang in ava chia tamai ui. Puitu mal aksi azui lai un a buai puau a, amau dawitelna achia phat un, amau bep hi loin, Jerusalem pumpi le abuai khawlaw ta ahi.

Amau ziakin Lal Herod in naupang tamtak a tha khaw-law a, lungzinna huaisia tak a tun khawlaw ahi. Kipilsak leh mani lem hiatna mai hin chu buaina bep a chawkdawk ahi

hih,! Hukdampa muna ding ahin mani lem hiatna hin um-zia anei lo hial ahi. Jerusalem ah mipil zosian le messiah pi-anna a hiat daw zawlo phat un Pathian lekhabu a hun phet ua leh, hukdampa pianna mun chu bailam chan ahun mudok tau ahi. Gingtu kal chawina ahinle gamman hun a um sek him a, maleh, Pathian lekhathu ah kile kit ten lampi dik a mu kit sek uh ahi.

Mipilte khanle Herod in kha nusia vak lo leu buai sawt di a hiu a, Herod in a hun nut-sia ua leh, a mau puitu aksi kha a malam un ala chia pek a, zia chu zui in nausen Jesu umna chungzawn in a ding ta, tichun alut ua Lal chibai a buk tau ahi. Herod in apat in huk-dampa muthei ahi pua, nutsia ngai ahi. Khawvel nawpchenna nusialo in Lalpa kiang tun thei hilo ahi.

Nausen Jesu a muphat un a go bawm teu hawng in thil-piak sana, begaw, murra, te api-au ahi. A thilpiak uhin Lal Jesu hina kim takin apuang lang ahi. Sana hin leng ahina, alopi-na, lei leh van ah lalpen ahina a etsak a, begaw hin Pathian sathaunu, gim namtui ah Path-

ian ma ah ki thawina ah a ma taksa ngei ahung kilat ding hi a etsak bawk a, murra hin mihingte gitlo ziak ah a hung thuk a, sukgenthei na tin cheng a hung thok di dan zosia a etsak ahi. Zia zosia etsak nei tak thilpiak chu mipilten nausen Jesu chungin ala bawl uh ahi.

Herod khan mipilte kha nausen amu phat ua leh, ama kiang ah hung kit dia ala ki hopi felsa ahia, maleh, Herod kiang ah chiakit talo din hil in a um tau a, a mau gamlam chiat in a chiatau ti ahi. Khristmas hi lamlui nutsiana ahi ding ahia, lamthak zawtna le ahi thung di ahi. Mipilte khan sukkhial ala nei tawk maleu, hukdampa amu phat ua khan vang, a mau pilna hita loin, Pathian thu dungzui zawk in, kal asuan tau a, Herod kiang lam a chiakit talo uh ahi.

Awle, simtu dawitak, tukum khristmas hi nangin bangtin mat la gaw em? Khawvel nopchenna zu mun limna, thanhuaina, thu mantheilo, tawt thanghuai, tite limpi mai ah hun mang liam mai gua ihi khak chun kum tampi khristmas mangta hile chunle, khristmas diktak

mangkha nailo hi ding la hi.

Khristmas neitu Pa Pathian in achapa changkhat neisun ei u diaei piak ni ahia, Mari in Lalpa thu thu kipiak lutna leh ahinna pumpi Pathian chawihawina nin amang a, Joseph inmidangte diklona um lele suk mualpho a gaw pua, van mipite khan Pathian chawihawi nan la alem ua, belampute khan athil hiatteu kha atak ah mu din atai uh ahi. Mipilten agobawm te hawn nan amang ua, alampi lui teu nutsia nan amang bawk ui.

Teksepu Simeon khande maw “Lalpa tuhin la suak hi thamuang taka chiasak di la hi ta. La hukdamna chu ka mit ngei in ka mu tai.” ti in khristmas amang ei vei!! Thi thamuanna tawh khristmas amang ahi khah! Tu kum hi khristmas la mat tawpna ding kum hi ta leh bang tin mang le chun la lung a kim thei pen diam,? ti gel pum in, lungthim leh titak takna tawh, Khristmas lopina ei mau ah gasua ngei din ka dawisakna sang pen in zia thute ahin Khristmas chibai kahun buk ahi.

.....xXx.....

# AW LIMNA KHRISTMAS

~Evan. T.L.Mang Vaiphei

*"Tuhin, Bethlehem lam in va chia hitiu in, Lalpa'n ei hung hil chu va en hitiu"(Lk. 2:15-16).*

## Thumasa:

**K**hristmas tha i tung kit tau a, a thupi ding in **Aw! limna Khristmas** ti hi mang in vak holim khawm hitiu. Khristmas hi a muchian tute a ding a chun limna Khristmas chu a hi ngei a, hi-maleh, Khrista mu lo te a ding a chun, sum jiak ah lungkhamna, vanh jiak ah beidawwna, chate daw i chawk zawlo jiak ah kingai-siatna tha a hung hi sek hi. Nausen hung piang Jesu en in chia leu hin, lei lam hinkhua i lungkhamna teu zosia hung bei intin, jawna hinkhua tawh kipakna leh limna chang ngei ding i hiu. Khristmas hi bang ti leh limna khristmas hi thei ding a hem? ti vak en khawm hitiu.

## **I. Jesu mu ding ah Lalpa ei thuhil gual ah Bethlehem lam juan ah chia a ngai hi:**

Lalpa'n a hilna gual in Belampute chu Bethlehem lam juan in kin tak in a kipan ua, a chia ngal uh a hi. Bang bawl ding ah chia a hui em? i ti chun, khawvel hukdampa ding ah hung piang nausen Jesu mu ding ah chia a hui. Luka 2:16na chun, "**kin tak in a chia u a**", a ti khel khel a hi. Kin tak ah chia lo in, awl in chia'u hen la, lampi po in cham malam taleu chu Jesu mu man lo in,

khawvel lopina leh hawina te haw thil intin uh lungmuang den in, Lalpa vansawlchak in mu ding ah a hil nausen chu va mu kha lo ding a hui. Tuni hun ah gingtute a ding ah bang jiak Khristmas hi kipakna ni hi thei sek lo a hem? i ti chun, Lalpa'n nausen Jesu mu ding, ama ah hukdamna chang ding leh ama chu i nisin hinna ah lal leh hukdampa nei ding in ei hil zing lai in, Lalpa ei thu hiatsakna sang ah eimau dawitelna lampi zui ah i chia zing jiak un, kipakna hilo in, lungkhamna,

beidawanna leh lungkiakna ni a hung hi zaw sek hi.

Tuni hun a hin, ei un le, Lalpa ei thu hiatsak dungzui a, Bethlehem bawng in ah hung piang nausen Jesu mu ding in kin tak in chia leu hin, nausen Jesu i mu chian phat uh leh kipakna limna chu nei ngei ding i hui.

Gingtu ka hi kiti tam tak in, Khristmas hun te a hin mu ding nausen Jesu mu lo in, mu lo ding jawk, sa belte, ju belte, gual leh paite, nik leh puan pha leh kicheina te i mu zaw sek ua, chuleh, buaipi ding nausen Jesu sang in, buaipi lo ding, nu-ngak a hem, tangval a hem, mi ji a hem, mi pa a hem, mi kichei dan a hem, mi um dan a hem po i buaipiu a, Jesu i muchian lo jia uh leh, i buaipi khak sek lo jia un, limna leh kipakna tak tak nei lo in Khristmas i mangzo kha sek ui. La go thil nei zosia nusia in, Lalpa'n a hun hil nausen mu ding in Bethlehem lam jua in kin tak in chia phawt in, nausen chu va mu chian phawt hitiu aw...!

## **II. Belampute'n nausen Jesu kichian tak in a va mu'u a hi:**

Belampute'n hiatsakna thu a dawn dungzui un nausen Jesu mu ding guan kin tak in a jua ngal ua, a hetu mai hilo in, a mit ngei un a va muchian ua, jia a muchian nau a chun kipakna a nei uh a hi. Aw!Limna Khristmas ti ah kipakna leh limna tawh Khristmas mangtute hi Jesu pian chanchin a hetu mai hilo a, a muchiantute a hi sek uh a hi. Tu kum tiang tiang ah Khristmas hi, limna leh kipakna tawh mangthei nailo a, Khristmas hun a hung hi cheng leh lungkham zing, buai zing, nik leh puan sil leh chen, nek leh dawn thu jia ah lungkham zing la hi chun, Jesu mu chian lo a, a chanchin hetu mai la hi jia hi kha ding a hi. Jesu chanchin hetu mai hilo ah, a mu chiantu belampute hi limna kipakna dim in, Aw ! Limna Khristmas a ti thei uh a hi. Khristmas hi nang leh kei a ding a le limna leh kipakna a hi theina ding in, Jesu mu chian

ding in kisa thak hitiu aw.

Tulai gingtute tam tak te hin, khawvel hukdampa ding ah hung piang Jesu sang in, khawvel et ah kilawmna i buai pi jaw'u a. Nek leh dawn thu buai pawl in a buai pi u chu sa bel bul ah kham ding, Israel chate Aigupta saltang a pawt daw hun ua lamkal ah Aigupta sa bel bul ngai a thum gual mai in i thum ua, Khristmas luaithena sa, ju ltawh me ding bep buai pi pawl la kitam ta maw?! Khenkhat la chu kicheina ding bep buai pi, lipstick, powder, eyebrow, eye shadow, taw-ka puan-ak, nik leh puanchen hawi nei kishowna lemchang a mang ah, a hung piang Jesu buai pi kha lo pawl a kitam ma ma ta'i. Khristmas hi nang leh ke'n i kipakna ding bep buai pi lo in, a hung piang Jesu kipakna ding hawl in i buai pi jaw ding uh a hi. \*\_Nang kipakna ding mai la buai pi laisia'n kipak thei tak tak pua'n la tin, a hung piang Jesu kipakna ding la hawl thei phat leh kipakna leh limna mu bep ding la hi\_\* ti hi la hetchian ka nuam hi.

### **III. Belampute limna leh kipakna tawh a kilekit uh a hi:**

Bethlehem ah khawvel hukdampa ding ah hung piang nausen Jesu mu chian tate lungngai ma ma ti a um ngai puai. A lungngai mitthi teu kipakna a hung chang sek a, a lungkham beidawmna teu nuina a hung chang jaw sek hi. Hiti hin vak genchia leu hin, nupa'n in cha a hun nei phat ua leh a kipak ma ma sek uh a hi. Cha nei jiaq a, da ah thum thum jiang mi a kihe kha puai. A um hial tak in le mi buai um hi ngei ding a hi. Nausen neite chun, a nausen jiaq ua a kipaknau seppitinna ding in, nausen kipakna ding hawl in a buai pi'u a, nausen a ka hun in le bang gual in bawl leng a lungdam in, nuam a sa'n a bi thei diam ti chu a buai pi pen uh a hung hi sek hi. Cha nei jiaq ah kipak talua, a nausen buai pi lo a, a nu leh pa'n amau kipakna ding bep a buai pi'u ti a um kha pua'i. A nausen kipakna ding jawk a buai pi'u a hi.

Tuni hun ah le nausen



mu chian a, neitute chun, amau kipakna ding hilo in, a nei uh nausen Jesu lung-awina ding hawl in, a chang leh a lampi'u a, a chang leh a kichawppi'u a, a chang leh a jan hapi'u a hi. Belampute'n le nausen Jesu a mu chian phat un kipakna'n a dim ua, jia nausen chu a hinnau ah lal ding leh a huk-dampa ding ua hung piang a hi ti a hechian ua, a neitu hina a chang ngal ua, jia chun a kipaknau a bukim sak diak a hi. Jesu a mu chiannau chun, a chanchin mi dang hilsawn utna a nei ua, limna leh kipakna thupi tak tawh a kilekit thei uh a hi.

Khristmas i matnau a hin ei uh le, limna leh kipakna bukim tawh i matzaw theina ding un, Bethlehem tiang tung ngei ngei ding in chia hitiu aw. Bethlehem tung zolo a, lam kal ah i chamden sek jiaq un, nausen i mu chian ngai lo uh a hi jaw'i. Tu kum Khristmas hi, nang a ding a chun la Khristmas mat tawpna a hi thei hi, ti ngaitua in la, kum chiata ah Khristmas hun ah Bethlehem

a la tung zo kha lo la hi in le, tu kum bek tung ngei ngei ding in kisa'n la, Jesu chu bang gual mi a hem, ti bek va hechian in. Nausen Jesu la muna ding ah daltu a um tak in le, jiate zosia chu paitha phawt in la, Jesu mu chian phawt in, tichun, limna leh kipakna chu chang ngei ding la hi. \*\_Khristmas dik-tak chu Jesu i lunggil sung ah a hung um phat bep leh bukim a hi\_\* ti hia'n la, jia chu chang ding in kisa'n. Nang a ding ah guat a hi.

### **Thutawpna:**

Aw! Limna Khristmas ti theina ding in Jesu hi i lunggil sung ah a chen a pawimaw a, jia chu mitin a ding a guat a hia, himaleh, \*\_Mosi sum gul khai kan, en tute'n damna a chang ua, a en nuamlote a thi gual un,\_\* tuni hun in le Jesu en a muchian tute chun damna chang intin uh, Khristmas dik tak chu a hinna'u in hung gasua intin, Aw! Limna Khristmas! ti'n limna leh kipakna tawh Bethlehem a kikat in hung kilekit ding a hui.

# Pathian nasem/Jesu Zuite um ding dan (Luke 9:57-62).

~Pro Pastor Pauneithang.

## Thupatna:

**P**athian lamkai na leh khovel a mihing te lamkai na a ki pumkhiak ziang ahi. Khovel mite nasep piak chu iki hou dungjui a hia. A dakkal in ahem, a ni kotha in ahem, a tha leh a kum in le ahithe i ahi. Pathian lamkai na nuai a, a nungjui ding chu, bangkim nusia jui chu ahimai ahi. Jesu'n kuan le ei jui anop chun, ama leh ama kihemilin, nisin a Kross pu'n ei zui hen ati ahi.

**1. Jesu'n, "Si-alte'n kua anei un, chungleng vachate'n le bu a nei ui; himaleh, Mihing Chapa hin vang lu-ngakna ding le a nei puai" ati ahi.**

I Lal Jesu ngeile khovel a Pathian sawl gual a ahung kimatchak a khan, genthei tak le thavai takin nangleh kei a ding in thi tiang in a hung thuak ahi. In leh lou aki khual man puan, cha leh nau a nei puai a ziak chu min a hinna alakpiak tau a akhang thu sut ding a nei talo ahi. Ziakachun, I Bible in Si-alte'n kua anei un, Chungleng vachate'n bu anei ui maleh Mihing Chapa hin lu-ngakna ding anei puai ati ahi. A hun zosia Pathian nasepna (ministry) chun alua suak kei jiang ahi. Nangle kei le, Christian khat ihi ahileh, jia gual ma chun Pathian in I

nasepna chiat a Lalpa Pathian gel poimaw pen leh gel khok pen dingin ei doi ahi.

**2. Jesu'n, "Mithi te chun amau mithi chu a la kivui tau hen; nang vang chia'n la, Pathian gam thu hi vagen jak ta'n," atia.**

Insungmi thi hial a vui ding le phal lou chu bang Pathian ahem? Ti thudot na bang um thei ahi. Pathian nasepna kimangcha khenkhat chu missionary gamchuam a thiden bang aum ahi. A insungmi te bang in ala thi san ti bang le aum sau sau ahi. Ahi ngut hi, ziate ho chule Jesu thugen toh bul tua in adik puai le iti diak puau, aziak chu Jesu a ding a a chan nau chu Lalpa'n hemil lou ding ahi. Tuivot noukhat mai bon Pathian nasem te adinga phal chun, alo man aum

ding ahileh, insungmi Pathian nasep ziak a vui manlo te ho chun, Pathian in tamtak in malsawm mama ding ahi. Ahin la, I gen ut pen uh chu ahileh, Lal Jesu'n Pathian nasep a poimaw dan leh gel khokpen ding ahidan, agen lat ut ziak zaw in aki mui.

### **3. Jesu'n, "Kua'e lou kaina langkawn tu tangal ah, nung lam en kit chu, Pathian gam mi hitak ahi puai" ati ahi.**

Pathian nungjui ding chun Pathian chu lunggil zosia, lungthim zosia, thagau zosia leh hatna zosia hepi ding hi Jesu'n thupiak laklak a chung nungpen ati ahi. Langkon tu a nasem lai nungram en en jiang chu, Krista a hinna neita maleh, ahin khua lui lam thil zing leh a hinkhua lui a hing zing tina ahi. Jesu nungjui ding chun, a hung nutsia na lei (bridge) chu a halthak malam ding tina ahi. Lei chu I halthak ahi chun, kinung le um ta lo ding tina ahi. I Pianthak ma I hinkhua phalo zosia kha va zuan kit thei talo ding tina le ahi. Jesu'n le thi ding hial chu haksa sa mama hinna, Pathian in I sulalna te ziak a Kross a thiding a ahung sawl ahi. Gethsemane

huan a khan, a pauchapna I et ahi chun, Pathian sawlna (Mission) supel ding in Themtu'n pan ala, himaleh Jesu'n a zawna chu a lopi ahi, "Keima thu hilo in, nangma thu hizo hen" ti'n Pathian kiangin akipe dawk zo ahi. Tichun, Jesu'n Pathian thu a zawpbukim ziaka chun, nang le kei in kumtuang hinna I nei thei ta ahi.

### **Thutawpna**

Kristian kitia Piangthak zosia, Pathian chate kihi ahia, Pathianin a chate zosia chu a nasemtu/ a Chapa Jesu nungjui dinga ei ko ahi. Zia Pathian nasem te chun Jesu kam suak I genkhawm teu gual in, Pathian a dinga pan lak a pawimo dan i heu ahi. Jesu nungjui dik tak hiding chun, a man atam ahi. Hukdamna vang nang leh kei dinga a thawn (Pathian a dingin vang a thawn ahipuai, a chapa changkhat neisun a thi angai ahi) ahin, Nungjui hinna vang a man piak angai ahi. Mani kihemil a nisin a kross pu dinga Jesu'n ei ko ahi. Zia ding a chu mimal, insung tin leh Kochuam te Jesu adingin pan lathak zel dingin kisai tiu. Lalpa'n simtute malsawm ta hen.

# HUKDAMNA (Salvation)

~Evan.Pautinlam

“Mangthaite hawla Hukdam dingin Mihing Chapa hi hung ahi atia” (Luka19:10).

**A**wle Hukdamna hi a pawimaw ma ma ah, thu chuam chuam tamtak ah le genthei ahia, a pawimaw bek ziakin-achang-chang leh miginum, mi piangthaksate hile i dawilo lam a genkhak tak ua lehle a piangthak lo, Hukdam hinailo hina-ei kiti changle a um sek ahi. Khenkhat ginchak lai-lai le Hukdamna changnailo i tidia malak kihechian nailo le a la um maw puan na e. Tuchung hin Zakai leh Jesu kimutuana pansan in zia gual hin vak enkhawm hitiu le.

Pakna Lâ phuaktute'n, 'Leilung pianlai ah thasa Belamno a thisan in Khawvel hukdam ta hen.' atia. Thuthunglui (O.T)hunlai ah, Israelte chun Pathian dawilo gual thil gilo (sual) abawl khak tak uh le gitlo ngaidam dawtna'n gan thisan, Belam ahem khat ala suau ah, Pathian kiang in kithawina ala nei sek ui. Zia chu Thasa Belamno ti ah La phuaktute'n paumat ah ala nei uh le hi mawpuana. Ahin, zia chule a lim mai ahia Hukdamna atak ala chanzo nai puau. Zia gual chun Khristian zosia'n i buaipiu chu hukdamna ahi. Etsaknan: Camping, Re-

vival Crusade, Seminar, Khawmpi, Beigual chuleh, Pathian Thugen gawi hitaleh i buaipiu zosia'n a tup thupi pen chu hukdamna ahi. Hukdamna hi alai mugil ahi gualin Bible pumpi ahinle thupi a nei chu Hukdamna hi ahi. Lal David chun apuksiat laitak in, 'Lalpa la hukdam limna ei pekit in,' ati, (Sam 51:12).Thasia ngawi ngawi in Pathian kiang in ala dawn hi.

**Hukdamna hi siamkawm thei ahi puai.**

Ei chu thil sual ka bawl pua, kinak ka ching pua, Zu ka dawn puai, Beri ka chep puai, Khaini ka ne puai, dam-

dawi (Drugs) ka ne puai, ka neu apat Khristian ka hi tai ti ah vak kigenlut thei ahi jiang puai. Amabo chu, hukdam hitak nunga Beri khu lut lut ah midangte ma ah vachep, Zu vakham jiang ahem, Juau thu vagen gen jiang chu Pathian gam in chan neipuan tin khawvel mite et ale a kilawm puai(Eph.5:5).

**Hukdamna hi nasep hat ziak leh fel ziak le ala hilo dan ahi:**

Kei chu, Biakin ka kikhawmlo kha puai. Migentheite ka panpi a, sawm a pakhat kape jinga, thagau mangthai ka hepi a, Pathian apat thilmak ka chang tai. Gamthim a dinga le ka petai ti ah va kipiak chuam thei jiang le ahi puai. Amabo chu hukdamna channa jalin zia haw hi mangcha'n Pathian gam chu kek lian dingin Pathian in amite chu a mangcha nuam ma ma ziang sek ahi.

Thagau mangthai matna ding in mihingte man(-price) hi a tam chuam leh tawm chuam a um pua, Pathian in kuama a mat chuam a um puai.Khamthei chingte ahem, thilguk chingte, juau gen hatte

leh mipha maw mama itite haw tawh Evangelishte, Upate, Pastorte, Officer mi thupi dang dangte'n le migenthe, meithai chagate taddawna dinga hin danglamna chuam a um pua, Pathian in thildang a siam le a um chuam puai. Asiam um sun chu A chapa changkhat neisun a hung sawl a, zia chu Jesu thisan tatna chu hukdamna chu ahi. Zia chu khawvel in a hiatseklo vang ziak in a dangchakna pen chu ahi.

**Ale hukdamna chu bang zia-ka pawimaw i hita diam le (Gen.1)**

Pathian thilsiam josia i et leh lei leh van a siam dante, hampa leh thai asiam dante, ganhing tawi thei zosia asiam dante i et leh Pathian in pha asa ma mai, atia. Ahin, adang asiambe jelsek a. amabo chu Gen.2:7 i et chun, Pathian in Lei ah leivui in mihing a siam a, a nak hawm ah chun hinna hu atha lut a. Mihiam chu mihing ahung suakta, zia zaw a chun adang asiam be ta puai. A ziakchu ama melpu asiam ama tawh kiothei, kipawlthei ahitak ziak un athilsiam zosia chung ah vaihawm ding leh

thunei dingin a kawī tai.

Pathian in Eden huan ah Numei leh Pawsal asiam, Eve leh Adamte nupan chu Satan(Diabol) in avathem puktau ah, Pathian tawh a ki-hothei talo in akikhen tau hi. Amabo chu mihing thinlung hi a hawm ngawn ah umthei ding in Pathian in alasiām ahilo ziakin Setan zawk chun mihing lungthim alua zawta, ziakachun, Pathian a dingin mihing chu, Pathian a ding in mithi asuak tai. Zia patsa chun mihingte maban chu gawtna, Thagau lam thina kipat chun Hukdam a pawimaw ma ma ta ahi(Rome3:23). Hukdamna chu haksatna, buaina chichuam chuam laka Hukdawna bep hilo in *Thil hikhialna leh gawtna, thagaulam thina apat hinna* gena ahi(Rome 6:14-23, Tita3:4, Heb.9:5, Rome3:25).

Awle! la phuaktu'n leilung pianlai ah thasa Belamno ati tak gual in, hukdampa Jesu chu mihing ngaidan in Mary sungin tha sawm vengveng ahung kijil a, Hukdamna asiamthei nai pua, Bethlehem Bawng an kuangin Nausen ngek dil del in ahung luma,

nausen ahi ziakin bangma a bawlthei naidiak puai. A hung khanglian deu deu a, khawlian leh khawneu a hung fang vela chanchinpha ahung kitangkopina in Zakai tawh a kimutua tai (Luka19:9). "Tuni hin zia In a hin hukdamna a tung tai" ti'n a puangdawk tai. Atawp in Kross kiput kawm in Kalvary tiang ah i gitlonau, i titlonau tatdawna ding in migilote tawh simkhawm in ahung um in Kross ah khetden in ahung um a, a thisan in hukdamna na chu a hung semta, Van kawt ahung hawng kitai. Pathian chu pak in um ta hen!

Taksa thina leh vangsiatna chuam chuam sanga le thupi zaw, thiamchan sakna, kumtuang hinna neina, Pathian cha ah simna, vanmi laka simkhawmna ahi tai. Zia hepina chu migilote kiang leh ginglote kiang in a um ah, a thuguk pen chu nang leh kei HUKDAM chate kiang ahin Pathian in akawi ahi.

Simtu zosia Pathian inmalzawl taken. Amen.

.....xXx.....

## JESU KHRIST HUNG PIANNA DING IN KHAWVEL KI-SALAWKZOTA.. NANG LEH KEI I KISAZO TAM? (Mak.1:15; Gal.4:4-5)

~Rev. Dr. Hangpi Manlun

### 1). Thumapui:

Awleh u-leh- nau lawi leh paite Pathian mapuina zal in kum 2018 kumbul a kipat Khristmas thillawk thei ding a ei puitu Pathian chungin kipak thu igen masa ahi. Tuchung ahin Lalpa Jesu hung piangna dinga khawvel kisingsak dan apatin holimna nei ding ihu. Chuleh, Jesu hung pian masang kum 500 vel in Jawlnei Mica in ala puanglawk zota ahi. (Mica.5:2). Ziaban ah Nungak thiangtho hin ahi ding thu le a piang masang kum 700 in Jawlnei Isai in ala puang zota ahi.(Isai.7:14). Ziabanah, amin ding tiang ala gen zota ahi.

Chuleh, Sawlchak Paul in, “Himaleh, a huntiam a huntung bukim phat takle, Pathian in dan thupiak nuai ah, numei sung ah hung piang in achapa ahung sawl ta ahi. Ziachu, dan thupiak nuai aum zosia tatdaw a, adawitel chate ahung hitheina ding uh ahi.”(-

Gal.4:4-5) ti i mu ahi. Ziachun, I Lalpa Jesu hi thakhat a hung pawng pian leh hung jiang ahi puai, Pathian thilguat kum tamtak nunga hung guitung ahi ti ihet ding uh ahi. Ziabanah, a pianni lawm te'nle hechianlopi a mawklawp dan a ngaipawl bang a um ua thilda umtak ahi. Awle, tuhin Jesu hungna dinga khawvel kisingsak dan chuamchuamte gen hi tiu.

### 2). Leichung Vaihawmna lam ah (Politics):

Jesu hung pianlai in Greekte leh Romte khan Khawvel pumpi ah vai ahawm ua, ziaban ah, a lenggam uh le atung ding uh ahi. Ziabeplo ah chun, zia hun lai a Rom mite tilo khawvel vaihawmna lam ah hetkham umlo tithei ahi. Tulaitak a USA-te din mun tawh kibang ding ahi.

Ziaban ah, Lengpa (Emperor) Ceaser Augustus in (BC 31-14AD) sung a vai ahawm sungin Rome lenggam ah khantona leh kithengna

(change) thupi tak aum a, zia chu, mipite a dingin galmuan-na leh zalenna a tun ahi. Chuleh, vaihawmna puaphat ahia, a gam pumpi Senatorial Provinces Emperorial Provinces ah khen ahi. Chuleh, lengpa Alexander in Jesu hung pianna ding leh athi, a thokitna ding thu kipak um mi zosia kiang ah puangdaw ahitheina diingin agam mun chuam chuamte ah vaihawmtu dingte le a kawi chiat ahi.

Ziaban ah, Juda Macca-bees in, Palestine gam a Judate a saltanna ua pat suachatna a chansak zaw apatin, Judate'n kum 100-sung vingveng Jentailte kiang ah sia (tax) a piak zing uh chu ah chawlsan tau ahi.

Zia hunlai a Rom lenggam kivaipuak dan chu zia gual hi ahi :-

(a). Romte'n khawvel pumpi a thunuai ua akawi u'i.

(b). Ziachu, Jesu Krista chanchinpha thu puangzakna ding leh vaksuk vaktana ding a hun lemchang tak ahi.

### 3). Judate'n Messiah kinepna leh a zalenna anei uh ahi.

Vangsiat umtakin Judate'n amau kivaihawmna

(Political Independence) BC 63-in Rom General Pompei khutah ala mansuatau ahi. Zia hun a kipat chun amau chu Rom lengten a awpkhum tau a, haksatna na menlo athuak tau. Rom lengpa nuai a a um uh kiningtel leh chimchak maleu amau hatna in bangma ah bawlthei diak puau.

Zia gual dinmun niam leh haksa tak ah a um lai un zawlneite genlawk gualin "Leng Messiah" hung pian ding apatin zalenna leh suachatna amu ding uh kinepna liantak nei in angakla mama tau ahi. Ahin, khenkhatten ngak zolo in helna ahung pantau a, Zealot ten Rom lengpa ahung do tau ahi. Chun, Pharisaite'n ahi kit leh Messiah hung intin, thagau lam halna hung bawldingin ala kinem u'i. Zia gual kinepna chuamchuam anei lai un, khawvel hukdampa ding ahung piangta ahi. Pathian lemsakna tawh Herod lian (The Great) chu vaihawm dingin guatin a um hi. Zia gual hun nuam leh vanglai ni chu Historiante'n "Pax Romana" (The Roman Peace) ti in atepte uh ahi.

### 4). Kikawmtuana (Comm-



**nication):**

Lampite chu hawitak in a kisiam a, khawneu leh gam ningkawi chanpha in lampi hawi anei chiat tau hi. Chun, Romte'n lampi bawl in nasem mi asing-asang anei ua, lampi kibawlnate chu Rom Engeneering-te nasep thupi tak khat ahi. Ziakachun, ni danglai in "Khawvel a lampi zosia Rom khawpi tawh akizawp" atiu ahi.

Chuleh, gamsung khawpi lamlian leh tuipte vengbit ding in sepai (galkap)-te kining ting takin anei u'i. Ziaban ah, gamsung leh sepai lam pua na dingin solkar in sia (tax) tampipi alakhawm sek u'i. Zia tawh kisai chun gamsung pumpi ah kisimpina (Census) aum zel sek ahi.

**5). Lungthim lam (Intellectual) ah:**

Greekte chu Politics lam ah musit um maleule lungthim ngaituana lam ah a sang ma mau ahi. Mediterranean tuipe kimvel gamte chu Greekte chawndan in a thuzaw vek phial ahi. Chuleh Greek Philosophy in mi ngaituanate luadim in, nguntak leh titak tak ah a thilsutna lam un mi-dangte akhanglo sak ma ma

ahi. Greek pau (Koine Greek) chu leichung pumpi paumat (Common Language) ahin, tulai i sappau (English) mat uh tawh kibang ding ahi. Ziate chu chanchinpha genzakna ding ah vanmat pawimaw takmai a hung suak zel ta ahi. Chun, Philosophy chuam chuam in lungkimna leh thamuanna a piaksang in thil piangsaktu Pathian chu kua ahem?tite hiat utna a hung piangsak zawta ahi. Zia gual dinmun ah ding a, thagau lam mitthum leh bengngawngte kiang ah chanchinpha gen ding a chun i hukdampa a hung piangta ahi.

Romte'n kikawmtuanna lam a maw apuak gual un Greek-ten le lungthim lam ah kikawmtuana maw apuau hi. uhi. Chun Hebraite Chu Juda sakhua Mosi dan piak in aum u'i. Zia chu Jesu'n ahung khanletpi ahi. Ziabanah, Mosi dan chu Pathian hing kilakna masa ahia, ahin a bukimna chu Lalpa Jesu Gospel ahizaw ahi. Thuthunlui hun in Lalpa Jesu hung pian ding a genlawk khat Thuthunthak ah ahung bukimta a hi.

**6). Pathian Mimat Leng Alexander:**

Pathian in Babylon- te suak leh sal a Israelte kum 70- sung a umsak lai in, amau puidawk ding in ginglote Lengpa Cyrus a mangcha ahi. Zia gual ah chun Khrista chanchinpha puangjakna ding in gam khat leh pau khat kihe- tua thei ding in mihat leh thil- bawl thei leh lopi Alexander kha Pathian in atel in amang ahi.

Tichun, Lengpa Alexander in agam lakna leh avaihawmna sung zosia ah, Greek pau, liter- ature leh achawndan uh nasa- tak in akhangsak ahi. Zia hun lai a Greek pau chu leichung pumpi ah thezak in a um ahi. Judate natiang inle a hiau ahi. A lekhabuteu le Greek pau in a hunglet un, Greek pau in Path- ian thu chu a hung thezak tau ahi. A ziak chu, Thuthungthak kha Greek pau ah ledaw masak pen a hung hita ahi. Zia kipat chun Jesu chanchinpha chu gamtin leh muntin in a hung kithang ta ahi.

#### **7). Khawtang (Social) din- mun ah:**

Zia hun lai ah chun Rom lenggam chu galmuang in um malehle mihingte hinkhua ah siatgawpna taw-

pkhawk atung a, mihawi gen ding mawngmawng a umlo ahi a kiti ahi. Rom.3:10-18 a kigen, mi zosia hiamngam leh numei pawsal kal ah thanghuaina in adim ua, suak leh sal in aki- nei ua, a zawng a haute chu kidaidan in, chaga-meithaite simmawna a uang mama ahi. (Rom.1:18-32) Zia bang law- mlawm a khawtang hinkhua a siatgawp lai in, liangvaite, saltangte leh migentheite huk- dampa ding in van apat in “Zingsawl Aksi” ahung vakta ahi. Halehluiah!!!

Zia beplo ah chun, nek-leh chak lam inle a niam ma mau ahi. Zia hunlai a chun Rome khawpi sung ah, mithum vak lak ah mi ni chu khutdaw ahi akiti hial ahi. Zia gual din- mun siatlai ah chun le lengpa kiang ah sia (tax) tampi pi api- au ua, lungkham leh puakgik neitak in a khawsau ahi. Zia gual mite chu hukdawk ding in mihing chapa ahung piang ahi. **8). Biakna lam (Religion) dinmun ah:**

Rom gamsung a chengte chu “Sakhua zalenna” piak in a um u'i. Ahin, Rom sepaiten a sukgentheinateu ziak in a lungthim un Pathian

muangzawlona leh ginlelna a nei ma mau ahi. chuleh, Rom miten le angaisang mamau, ni-danglai a a Pathiante uh haisan a Rom leng thisate leh damlaite biakna “Emperor Worship” ahung pantau ahi. Ziaban ah thil dang chuam chuam biakna leh lunggulna anei ua, zia chun thagau lam dangchakna tak tak apethei diaklo ahi. Ziagual ah lungthim beidawng leh thagau lam dangchak taka mipite a umlai un, a damsak thei ding Pathian a lunggul vung vung lai un, “kipakna/lungdam thu gen ding in” Pathian chapa Jesu Khrista chu sawl in ahung umta hi.

Chun, Rom lengten Pathian dinmun a din gua a umlai un, mi lungsung ah Pathian gual a ngaina aneisak zo puau. Tichun, Pathian taktak lunggulna ahung neilaw ua, tichun Pathian taktak Lalpa Jesu Khrist chu ahung kilangtai, zia chun thagau dangchak zosia subei in lungmuanna leh kipakna anei tau.

### **9). Jesu pianna mun Palestine gam leh aumna mun:**

Mithiamte gendan in Palestine gam khu khawvel pumpi a ding a, mun lailungpen ahi atiu ahi. Zialochun, Asia, Europe leh Africa-te a

ding in le alailung a um ahi. Ziakachun, Pathian in khawvel kawlkil li a chanchinpha puanzak theina ding in a chapa pianna ding in Palestine gam chu ahungtel ahi.

Thingtang gam lo ibawl phat le alai ah lo buk ibawl ua, zia chu a kim apamte etkawl-na ding leh azawtnawp ding a i bawl uh ahi. Jesu pian thu chanchinpha khawvel pumpi a genna ding in, Pathian in khawvel a ding a, a lailungpen (Palestine) gam ahung tel ahi. Tuni'n, Pathian in a Chapa hung pianna ding in ei mihingte a ding a alai lungpen i “Lungchang” adawi in zia mun ah chu ipiangsak ding ahi.

### **10). Thukhakna:**

Awleh, i Lalpa pianna ding a hiatlawklo himaleh kisingsakna khawvel in a neilai in, ei ama batpi a siamte leh zuitu, Khristian kitite hin bangzat a i kisingsak uh angai diam? Chuleh i hukdampa ei tan diing a hung piang dingpa chu bangtin i lamtua diam? Chuleh, khawvel pumpi Jesu lamtua dinga, kimansa aum gual in nang le kisakhol inla la lungthim sung ah piangsak ta'n. Lalan simtute zosia eimawsawm taken.

# NAUSEN LAWM DING AH CHIAL A UM BELAMPUTE (Luka 2:8-20)

~ Mr. Pauthiansang  
Serampore College

Luka 2:8-20 na hi I vak et ahi chun, Pathian in Nausen lawm ding ah belampu te a chial na chungchang leh a kiang ua chanchin kipak um tak a tut dan thu te hi chian tak in mu thei in a um ah. Chuleh Nausen lawm ding ah kal a suan dan thu teu le mu thei in a um bawk ahi. Ahinla, tuni hun ahin, a Bible hilchi-anna lam leh a sung thu ngaitua na lam sang in, Nausen lawm ding ah Belampute chial ah a um na ziak uh leh a dinmun lam pang zawk uhi chawm chan vak ngaitua khawm leu hin inuam zaw ahi.

Amasa pen in I lalpau Jesu Khrista pian champaha, lawm diang ah chial ah ala um masa pen te dinmun hi I vak ngaitua ahi chun, lungthim leh ngaituana akhawi khawp mai ah. Aziak chu, mite musit leh pampai ah um in, kouchuam leh khawtang ah dinmun niam tak in a um un, sakhuaana lam inle chanvou bangma a nei ngailo bawk uh ahi, ahinau chu mi nuainungte ti a het chu ahi pen mai uh ahi. Tichun, kuama thulak leh ngaisak in a um puau ah, amau apat thu tak him him pawt dawking in le gingchak na a nei ngailo bawk uh ahi. Chuleh, insung khawsak haksat na ziak leh a

belamteu ngaituana ziak in, sakhuaana lam ale ki mangcha man talou khawp hial in a buai un. Abelamteu chu temple ah halmang thil lat ah mat hi sek maleh, amau taksa ngei a temple a va kilat thiango ding chu thil haksa tak ala hisek ta ahi. Ziakiachun mite mit mu in migilo leh Pathian ngaisaklo mite ala hi ta sek uh ahi.

Ka ngaitua sek ah, zia gual ah dinmun niam tak leh sakhuaana lam ale kimangcha manlo khawp hial ah um mite ala hi zing lai ua, bang ziak ah, I Lalpau Jesu Khrista piancham pha lawm ding ahin chial a um ei diam uh aw ti hi ahi. Aziak chu Mihing ngaitua-

na in chu, lei leh van ah Lalpen hung piang chu, lei ah Lalte leh Sakhua puitute ma chu chial ah um masa leu chu ki lawm tak ahin. maleh zia gual chu hilo in, mite musit leh pampai a um Belampu te chu chial in a um zaw ta mai uh ahi.

Zia chungchang ahin ngaidan tamtak leh gendan tamtak a um thei ah. Etsakna ding in: mikhenkhat chun, Jesu Khrista ngei inle “Keima hi Belampu pha ka hi” ati ziak leh mihingte chu belam gual ah a tekhn sek ziak ah, a pian hun ahin le Belampute hi chial ah um ahiau, ti'n ala gen ua. Khenkhat chun, Belampute hi mi kingaitawm ahi ziak uh ahi, ti'n le ala gen kit bawk uh ahi. A khawi abang chu hita leh, athugenteu chu adik puai tina hilo in, tuni hun ahin le ziagual deu a chun et dan chuam in vak en leu hin I nuam ahi.

Zia chungchang hi ka vak ngaitua phat leh, Pathian in Nausen lawm ding ah Belampu te achial na ziak hi, khenchuam neilo Pathian ahi dan leh; mi ahina ziak uh leh a dinmun ziak ua dawisak chuam neilo Pathian ahi dan hi ei kawkm nuam hiding in ka

gingcha. Chuleh, Chanchinpha hi mizosia ading ahi dan leh Jesu Khrista hi mizosia hukdampa ding ah hung piang ahi dan hile ei kawkm nuam hi ding in ka gingcha bawk ahi. Aziak chu, zia hun lai ahin mi-genthei leh mihausa kidaidanna bang hi ala sang khawp mai ah. Adiak in belampute amusit nau chu genguallo in ala sang ahi. Khawpi sung leh vengsung ah a lut ding uh chu phal piak ala hi ngai puau ah; thupha lâ pha dawng ding inle dawisakna him him ala chang ngailo bawk uh ahi. Chuleh, gancha gual mai leh uicha gual mai in musit leh pampai in ala um un, kuama thulak leh taksan in ala um ngailo uh ahi.

Ziagual dinmun chu ala hi ziak in, Nausen lawm ding ah Pathian in Belampute ala tel ziak hi Khawtang leh kochuam ah, nei leh lam chungchang ah kidaidanna bang ala um zing chu sukchip anop ziak leh khenchuam neilo Pathian ahi dan asuklat nawp ziak hipen ding in ka ngaitua ahi. Chutichu hilo henla hileh, Belampute sang ahin, mithupi tak takte leh khawvel vaihawmtute hi chial ah a um ding

uh kha ka gingcha ahi. Maleh, zia gual chu hilo in Sawlchak Paul in “mi pilte chu a mualpho theina ding un, Pathian in khawvel thil ah ngolhuai leh mu tawm umte chu, ... a têl a;” (1Korinth 1:27-28) ati gual khan. Pathian chun, mite mitmu ah musit um tak leh simmaw um tak balemapu te himaleu, musitlo hial in kenchuam neilo Pathian ahi dan leh mithupi te leh michapote amualpho theina ding un, mi nuainung pen Belampute chu ala tel zaw ta mai ahi.

Aw Khai! lopi chu kavak sa na lom lom e Pathian lemguat dan hi. Mihing pilna ziak leh dinmun sang tak tak te ziak ah tel a um ding hileu vang chu, zia tak ah belampute hi a tinglo sa ahiu ah. Chuleh, mihing felna ziak leh kochuam lam ah ki matchakna ziak ah tel a um ding hileule atitna ding uhi mu ding a umlo bawk ahi. Ahinla mihing tena gual ah tena siam ngailo pathian chun, ahinau leh adinmun teu chu enlo in, mizosia ading ah chanchin kipak um tak chu mi nuainung pen te kiang leh dinmun niam pen te kiang in le ahung hetsak zaw ta ahi. Chu-

leh, Belampute kiang ah chialna tilo hi Nausen lawm ding ah chialna dang ala kimulo bawk ahi.

Ziaziak achun, tuni hun ahin, I masang ua I Lalpau Jesu Khrista piancham pha lawm ding ah ikisingsak nau ahin zia mite(Belampute) gual ah, khawsung leh vengsung ah mite musit leh pampai ah um in, insung khawsak haksatna ziak ah dawu gual tak ah kochuam ale kimangcha manlo ila hi mai thei ahi. Maleh Lalpan, A chapa piancham pha lawm ding ahin, khawvel vaihawm-tute leh sakhumite bep hi chiallo in, nang leh kei, belampute gual ah hinkhua mang sek, mite musit leh pampai a um; asun a zan ah insung khawsak haksatna ziak ah dawigual ah kochuam ah le kimangcha manlote hile ei chial ahi. Chuleh, zia Nausen lawm ding ahin, Lalpan dawichuam bik leh telchuam bik neilo in mi nuainung pen Belampute na tiang le ala chial ahi.

Lalpan Simtute zosia, I chan ding chiat un ei malsawm piak ta hen, Amen.

# Ei uh a dingin nausen a hung piang hi

~Rev. Seilunlal Vaiphei

**P**athian pui huaina zalin Chistmas tha ihung gal kai to tau a, zia tiang ei puitungtu Lalpa chu pakin um ta hen. Kumsin in I la gen zing tak uh nausen hung piang ngei hi bang gual nausen ahia, bang ziaka ikipakpi sek uh ahem? ti hi neucha vak en thak kit hitiu.

## # Hukdampa ahi:

Luke 2:11na I et ahichun, nausen ahung piang chu “Hukdampa” ahi ti imuthei un ahi. Ziaziakin chun, ahung piang thu hi “Chanchinpha” tia vantil techun ala gen hial un ahi. A ziak chu, khawvel mite adinga hukdampa ahi ziak ahi. Damsung a thi ta ding sa te, mimal kitandaw zo talo ding khawvel mihingte hukdam na dinga hung pa chu ahi.

Vaihawmtu Herod leh asepai te chun alal hina ngawn ahiau a, a hukdampau ahilam kua man ala hiatlo ziakun nausen dang tampi'n thina ala tuak law un ahi. A hukdampau ahilam ala hia hitaleu chu Lal pian ni Lopi taka mat hi ding ahi. Aziak chu, dan nuai ahi kua ma thiamchang theilo ahia, amau ngei le dan nuai apat zalen na nikhua chu tha ngai ma ma ahiau.

## # Chamna Lal ahi:

Isai 9: 6 na hin Chamna Lal Chapa ahi ti muchian thei ahi. Khawvel leh asunga mihingte'n apawi maw pen khat chu chamna hi ahi. Zi-aziak chun, ki chamna a um theina dinga chun, Gam sorkar, Nam puitute, mi lian mi lal zosia'n lampi chuam chuam in ngaitua na pian abuai thei ma ma un ahi. Himaleh, Khrista alunggil sung ua a vawp ua anei tak tak masia'u mihingte'n chamna leh thamuanna nei theilo ding ahi. Aziak chu, Lal Jesu hi Hukdampa chau hilo in Chamna Lal le ahi. Chamna hi hukdamna ga ahi. Mihingte'n a lunggil chiat ua Lal Jesu chu hukdampa ahi ngei hi ti ngaitua na aneithe phat uleh athinlung ua pat ga hung pawt masa pen kha chamna leh thaman'a ahi sek hi.

## # Chanchin kipak um ahi:

Luke 2:10 na hin mi zosia a ding ah nausen hung piang hi, chanchin kipakna thu pha ahi, ti'n ala gen hi. Kipakna hi khawvel kipakna a um hi. Sum leh pai mu ziak, Exam lawtin ziak, taksa hatlona kipat damna chan ziak kipakna, gil ah ga hun sawt tak neitheilo kinep umlo nunga hung nei ziak kipakna leh adang dang tampi a um hi.

Khawvel kipakna hin hun sawt adai pu'a'n, genthei, haksat, beidawn nin ilungthim ei sunem zo tak tak lo ahi. Van apat hung kisawl Nausen hung piang hin, a te pi ding umlo van kipakna chu ei chansak ahi. Khrista apat hung kipan van kipakna hin vang, genthei haksat ni hitaleh, ilungthim uh thamuanna i nei theilo niu inle ichan chungun lungawi theina leh kipakna ei tut thei hi. A chanchung'a lungawi theite khel'a hinkhua nuam ding um tapuan'a.

#### # **Thamuan na ahi:**

Mihing hinkhua ah thamuana I pawimaw dan uhi la ngaitua kha em? News paper, WhatsApp, Radio chun media chuam chuam I etchun, khawvel ah mihing hinkhua

um dan hi I chan chung ua lung awi nahi I pawimaw tak zet ui ti hiat chian ziang thei ahi. Thamuan na I mamaw dan uhi gam thalek ah dangchak ngawi ngawi ah khawsa um gual ihu.

Taksa hatlona lam inle, natna huaisia Doctor ten alung gim pi mamau leh alaw ngaina ahiat taklo ziang uh natna chuam chuam nisin in apun be zing hi. Zia gual ma chun, kitha ki mat, meithal ah kikaplik, hunam ah kithana nisin in a kibelap in apung tul tul hi. Mihing khat ki tha dan hi ganhing/gancha kitha gual chet ahi tai.

Hun nunung lam ahi tak tawh kitawn in, man bei ah Chapa piak ihi tak ziakun, ama ah ki nga leh ama tha lim nuai in um hun hita lo ahem? Pa Pathian chapa liangko ah chun thuneina a um a, a thuneina hung khanglian zel in, a lenggam zosia a chun kichamna um denta ding ahi. Ama bel zing a athu mang tapote chu tungding in tudet zing in kumtuang tiangin achate chung in phatchuam/zan-gaina'n um den tanna.



# JESU PIANNA KHANGGUI A NUMEI PANGA(5) TE (Mathai 1:1-16)

~Pro. Pastor Pauneithang.

## THUPATNA:

**T**huthung lui (Old Testament) a Khangthu sutna Numeite pang ngailo ahi. Mi kisimna (census) ale numei leh naupang a simkhawm ngailo uh ahi. A ziak chu ni-dang laia Israelte'n numei hi gothil nei tawh kibanga akawi uh ahia, mihing tinglo, vangam le nauhing ziaka kai dinga akawi uh ahi. Numei chu dinmun niam leh sia taka ako\ awi uh ahi. Ahin Thuthung thak (New Testament) Mathai bung khatna a Jesu Khangthu sutna ahin, Pathian in numei pangate hi a hung pangsak ta ahi. Jesu Pathian hing Chapa, hepina leh thutak a dim ahi. A khangthu sutna mai inle khawvel Pathian lung lama a theng danglam pan ngal ahi. Khawvel siam ma a um Khrista chun, a hung pianna khanggui ding a helawk vek ding ahin, van a pat a pianna ding khangthu kiziakna ding a chun numei le chuang ding ati bep hilo in, numei laka le phalo ma

ma, ten um, khanggui thian-glote le a pan sak ahi.

Ama Pathian Chapa chu, Mihing a hung pianga soal a sim khawm ding ahiz-iaak in, mihing mitmu inle soal pen pen te chu a hung tel ahi. Soal thuk pen a umte le hukdam thei ahi dan etsak na le ahi. Chuleh, Jesu Krista a Pathian hepina hin mi zosia huap suak ahi dan, khen chuam neilo ahidan, bana a nuai nung pen pen te haw le huap suak ahidan muthei leh hiat thei ahin, zia chu i sulang nuam uh ahi. Chuleh, a hepina nasep Kalvery Kross a agalazawna leh, ama gingte a dinga a muan um dan leh, a hepina I sulang nuam uh ahi.

Mathai 1:1-16 "Abraham suan, David suan ah Mes-siah kiti, Jesu hung pian dan chu zia gual hi ahi: Abraham chu Isak pa ahi'n, Isak chu Jacob pa ahi'n; Jacob in Judah leh a suapite a hing a; Judah in Tamar ah kipat in Perez tawh Zerah a hing a;...Salmon in

Rahab ah kipat in Boaz a hing in; Boaz in Ruth ah kipat in Obed a hing in;...Jesse chu lengpa David pa ahin; chun, David chu Uriah ji (Bethsheba) tawh a chau Solomon pa ahi. Solomon chu Rehoboam pa ahi'n...Joseph chu Mari pawsal chu ahi. Zia Mari chu Messiah kiti, Jesu hung pianna chu ahi.”  
**JESU PIANNA DING KHANGGUI A NUMEI PAN-GATE CHU**

1.Tamar 2. Rahab 3. Ruth 4. Uriah ji (Bethsheba) 5. Mari (Jesu pianna nu).

Amau hinkhua apat hin zil thei leh phatchuampi bang I nei uh em tin, a ban ban in en hitiu.

### **1.TAMAR: Genesis 38:1-30**

Tamar hi Judah chapa Er ji ahi. Judah'n a chapa ji Tamar a luppi a, Perez toh Zerah a hing ua, zia khanggui chu Krista'n a pianna dinga a hung tel ahi. Mou toh a Talpu lumkhawm chu bang gual a ten/kidak um ahi ta diam? Maleh Jesu Krista, Lalte Lal, Pathiante Pathian, Israel Mithiangtho Pa chun, mihing sual a pukta te hukdaw na dingin, sual ten/kidak um pen te le a pian na khanggui ding in a hung tel

ahi. Sual a pukte hukdaw na dingin sual toh Krista chu simkhawm(identify) in a hung um ahi.

### **2.RAHAB: Joshua 2:1-24**

Rahab hi Nochizuak numei ahi. Joshua hunlai a, Kanaan gam entha dinga mi pani a sawl te kha, mata um ding dinmun a um lai chu Rahab Nochizuaknu hin a Inna a selgu, tichun a suak chau ahi. Nochizuak himaleh Israelte Pathian a gin ziak in ama leh a insungmi zosia hukdaw in a um ahi. Zia Rahab hin, Israel mi Salmon pawsalin a nei in, chapa Boaz a hing ua. Zia khanggui chu Jesu hung pian na khanggui ahi. Jesu'n van a patin a khanggui a pianna dingin Rahab nochizuaknu le a pansak ahi. Nang le kei in vang Nochizuak te chu kizuipi ding leh kiloi pawl pi dingin le I ten/kidak ahi. Miten ei mu soi in au iti ahi, khosung leh veng sung mite'n ei pampai in au iti ahi. Jesu'n Nochizuak te le a hepi ahi. Amau khanggui a pian le khok asa zou ta puai, nang leh kei hukdam a I umphot ding ahi chun. Jesu hepina'n sual thukpen le a huam ahi, sual sim a, sual ngaidamna Jesu

Kross tatna thisan ging zosia chu a hukdam a hi. Halleluiaah!

### 3. RUTH: Genesis 19:30-38

Ruth hi gentel mi Moabte ahi. Moab te hung kipan dan chu, Lota zukham laitak a chanu tawh a lupkhawm nau apat ahi. Suapite, Pa toh chanu lupkhawm ziak a suante chu, tulai inle mou ding leh pawsal ding in le, dawimlo leh ten/kidak um iti teu chu ahi. Phung thianglo ti mai ding dan ahi. Khosung, veng sung leh namsung a um ding in le dawimlo ahiu. Tigual suan a piang te le vangsia kisa ma ma ding ahiu. Amau in a tel uh le hilo, a pu leh pa teu soal ziaka, mi'n ten um eiti diu chu ut umlo taka hi. Himaleh, Lal Jesu'n khanggui thianglo, pa toh chanu umkhawm suan a hung pian Ruth chu a pian na khangui in a pangsak ahi. Sua-pite, nang leh kei in le tigual a thianglo phung a piang te leh, a kibatpi thianglo a igen sek uh um te haw, Jesu Krista lungthim put gual pu ding in, Pathian in ei doi ding in la gel thei em?

### 4. Uria ji (Bethsheba): Mathai 1:6

Bethsheba ti mai tak di, Mathai in "Uria ji" ati khel mai

hin chu David soal na a sulang ahi mo? David ji hingal a, Uria ji alakpiak chu ahi. Uria ji alakpiak bep hiloin, Uria a tha le hiating in aum ahi. Leng David hi Israel leng te laka le thagaumi pen a hiat ahi, a leng hina sangin le David hi a Pathianmi hina hin mite'n a he zou ahi. Himaleh Pathian sathau-nu thagaumi pen pa hi a soal pen a bang jiang hi mo? I gen ut pen uh chu ahileh, David in Ji tamtak anei a himaleh mi ji a lakpiak Bethsheba pen khel hi Jesu'n a pianna khanggui ding in a hung tel ahi. David in Uria ji toh a zawntat zia-ku cha masapen chu a thi'n a suun ahi. David cha suun thu akigen in a dik ahi. Ahinla, Uria ji Bethsheba hin luang ni a suun ahi, khatna a pawsal Uria a suun a, ani na'n David toh a chapa a suun ahi. Bethsheba hi David ji te haw laka le lung liangvai leh lungthimna pen chu hidi ahi. Himaleh jia lungthimna numei chu Jesu'n a pianna khanggui in a pansak ahi.

Suapite, la hinkhua la liangvaina leh lungthim natna ma ma te kha Jesu'n ahung hetpi ahi, Lalpa'n bangkim a

hepite chu, a phatna ding ua a bawlpiaq sek ahi ti hi ging in.

David toh Uria ji (Bethsheba) in Solomon ahing ua. Solomon suan Joseph, jia hi Jesu pa chu ahi. Joseph hi a pa tak tak ahi pua, maleh a khangthu sut dan a Leng hina, David suana a dik a ngai ahi. Chuleh, David suan apat dik tak in Juda mi Mari numei sungin Thagau Thi-angtho thilhitheina in nausen a vop sakin a hung piang ta ahi.

### **5. Mari (Jesu pianna Nu): Matthew 1:16**

Suapite, Mari'n Jesu pian (Khristmas) a mat na dinga a ginna hi etton tak kasa ahi. Vansawlchak in nauvop ding ahidan a genlai in, a dawnhu na chun, "Lalpa suaknu ka hi, la thu gual gual in ka chung in tung ta hen" ti'n a dawn hu ahi. Nungak virgin khat Joseph mipha tak toh kingai lai chu, nauvop jiang di chu haksa pi tak hina. Zia na ahin, I etton thei ding uh thil lianpi tak pani Mari'n a chaan a um ahi.

Zia te chu:

(i) Mari'n Jesu a dingin a ngaizawng/dawngma pa a chan ngam ahi.

Joseph hetlo a gai ding ahi chun, nungak thiangtho

hingal a a ngaizawng pa ang a nauvop ding chu, a ngaizawng pa'n a khen ding hetsa ahi.

(ii) Mari'n Jesu a dinga a hinna a chan ngam ahi. Nauvop ding ahi chun, a tumpi puak intin, Pawsal la neilo ahi chun, Mosi Dan thupiak Zawntatkin ati kha zuilo hiding ahin, Dan umsun chu suanga selup ding ahimai hi. Jesu hun tianga bawn Numei zawntat nu suanga selup dinga hung kai thei ahiu chun, a pian ma a nu Mari hun lai vang vang ahin chu, Dan khau didan hiatsa ahi. Mari chu Jesu a sunga vop zia-ka suanga selup di hiziang leh le, Pathian amasapen in a koi a, Pathian thu thu um dingin aki pedok (surrender) ahi. "Lalpa suaknu ka hi, la thu gual gual in, ka chungin tung hen" ati ahi. Tichun, a mualpho na ding leh thina ding chu, Hatchungnung Pathian thilhitheina leh lopina'n a lia khu ahi.

Suapite, nang leh kei in le Jesu Krista hi bang cheng sang inle I tel zawkding ahi. La phuaktu chun, "Gam lian-tak a thuneipen hi sangin le, Jesu nei ka nuam zawi" ati ahi. Mari gualin, tuchung Khristmas matna dingin le, Pathian

thu thu um dinga iki piakdaw(-surrender) ahi chun, Pathian umpina leh lopina “SHEKINA Glory” chun hung liakhu intin. I KHRISTMAS mat hi lawting pen kihi ding ahi.

### THUTAWPNA:

Jesu Krista khangthu sutna a numei panga te Tamar, Rahab, Ruth, Uria ji (Bethsheba) leh Mari (Jesu pianna nu) hinkhua apat hin, Pathian hepina chu mizosia a ding ahidan hetdaw thei in a um ahi. Jesu'n, khangthu sutna numei panglo leh genphak hilo chu, Juda pupa chondan leh sakhua dan paltheng in, a pianna khangthu chuang dingin Thuthung thak masapen Mathai bungl na'n numei panga a chuansak ahi. Society sunga bangma simlo leh pang phalo te, Tamar a talpupa toh umkhawm, Rahab nawchizuak bang a khanggui a pang dingin a tel a. Ruth a pianna khanggui sut in Lota leh a chanu umkhawmna pat chisuan lak a piang nu ngei le, a khanggui in a pansak a. Uria ji Bethsheba ngei le lungthimna tak leh liangvai, a pawsal leh a chapa suun a um le a gel poimaw a, a pianna khanggui in a pansak ahi. Zia ban a chun, Mari, Nungak thiangtho pen

leh Pathianmi pen, Numei laka le phapen in a, a tel hi a pianna Nu dingin. Tichun, Jesu Krista a Pathian hepina hin mizosia a huap suak ahi.

Suapite, nang leh kei, Lal Jesu'n a thisan a ei chokdaw tak I hia, Kross a ei tatdaw na zal a chun, Pathian cha I hiu ahi. Ziakachun, Paul in zia gualin a gen ahi, “Ei khen zo lo e! Zia zosia ah chun ei haw ei hepipa zal ah chun gal zo te sang ah chungnung zaw I hiu. Kichian takin ka he ahi, thina a hem, hinna a hem, vansawlwchakte a hem, lalna a ahem, thil um lai a hem, a hung um ding a hem, thilhitheina a hem, sanna a hem, thukna ahem, thil siam dnag him him inle I Lalpau Jesu Krista ah um, Pathian hepina kipat chun ei khen zo pua'n a.” ati ahi. Zia guala hepina det Jesu thisan a kumtuang thuthung, Pathianin a hung thung ziakin. A pianni champha “KHRISTMAS” ei hukdawk dinga mihinga hung pianni chu lawm in, Ama pakna leh chawihawina in iki mangcha ding ahi. Thagau leh thutakin Pathian I bia ding ahi. Simtute Lalpa'n malsawm ta hen. Amen.

## 'DAMNA AW' PHUNGVUKTUTE :

### PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Nk. Lalsangpui, S.Kotlian
6. Upa Laltinkhup, HQ. Church, Tuibuang
7. Pi Manliankim, HQ. Church, Tuibuang
8. Upa D. Mina, Lingsiphai
9. T.Upa Ph. Gena, Lingsiphai
10. Pu. Khamlal Saipum
11. Pu Khamliankap Saipum
12. Pu. Tinlunlal Saipum
- 13, Pu. S.Kapbawi New Delhi
14. Upa Genhau Central Church,Compound veng
15. Pu. Khailianbawi Central Church,Compound veng
16. Pi Kimtawi Kohima

### MEMORIAL GIFT :

1. Pi Deem Melody, **Central Church, (Rengkai)**  
*[in loving memory of (L) Upa Lamthianlal]*
2. Pi Rebekah **Kangvai**  
*[In loving memory of (L) Pastor Khaivung]*
3. Upa Liansomthang **Lingsiphai**  
*[In loving memory of (L) Pu. Henzagen]*
4. Pi. Nem Grace Boisi Capvung **Delhi**  
*[In loving memory of (L) Pi Vanlalchhuangi]*

### SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Rev. S.T.Kaia Vaiphei Nghathal

12. T.Upa KK Siam	Tangmual
13. Pi Chinneilun	Tangmual
14. Upa Khaineilal	Leilon
15. Pu Lemthang	L. Mission Veng
16. Upa Thangpu Changsan	Happy Valley(Leimakhong)
17. Pu Kham songoulian	Kohima

**ENCOURAGERS :**

1. Pu P. Kamneilian,	Lingsiphai
2. Evan Thianlam	Lingsiphai
3. Pi. Dampui	Lingsiphai
4. Upa K.Thanga,	Kangvai
5. T.Upa Manglem,	Kangvai
6. Upa S.Bela Capvung,	Kangvai
7. T.Upa David,	HQ Church, Tuibuang
8. T.Upa Khupneu,	HQ Church, Tuibuang
8. T.Upa Zamthamuan	HQ Church. Tuibuang
10. Pu Lamthianlun,	Central Church, Compound Veng,
11. Pu Vendam,	Central Church, Compound Veng,
12. Pu Haudal,	Nghathal
13. Pu Khamlian khual,	Nghathal
14. Pi Mary Vaiphei,	Nghahal
15. Upa Paukholam	Nghathal
16. Pu Tongzahem	Nghathal
17. Pi. Nunmawi	Ngahthal
18. Pi. Kimbawi	Nghathal
19. Pu Kaikham	Saipum
20. Pu Pauthianlal @ Mengpu,	Saipum
21. Upa Ginneithang,	Saipum
22. Pu Donggen	Saipum
23. T.Upa. Lallawmthang	Saipum
24. Pu. Damthang	Saipum
25. T.Upa Ginlun	Saipum
26. Pu Kaipau	Saipum
27. Pu. Khamthianlun	Saipum
28. Upa. Kaijuanthang	Tangmual
30. Rev. Haulalven	Tangmual
31. Pu Gomang	Tangmual
32. Pu Kamneilal	Tangmual
33. Pu Kaisawmlal	Tangmual
34. Pu Thangneilun	Tangmual
35. Pu. K.Minlian	Tangmual
36. Pu. Khamlallawm	Tangmual

37. Pu Thangthianmang	Tangmual
38. Pi. Niangphal	Bisanmual
39. Upa Nehneithang	Leilon
40. Upa Khupmang	Leilon
41. Pi. Hawiniang	Leilon
42. Upa Tongneilal	Leilon
43. Upa Thangmang	L. Champhai
44. Upa Ph. Kamlam	L. Champhai
45. Upa S.T.Siam	L. Mission Veng
46. Pu. Seidam	L. Mission Veng
47. Pu. Hentinmang	L. Mission Veng
48. Pu. Malzawl	L. Mission Veng
49. Pu. L.K.Vaiphei	L. Mission Veng
50. Pu. Lemlian	L. Mission Veng
51. Pu. Hausang	Shillong
52. T.Upa Lallianthang	Salem (Tipaimuk Road)
53. Pastor Kaiminlian,	L. Saronphai

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
- (ii). Supporting member- Kum 2 (two) a ding in ₹. 2,000/-
- (iii). Memorial Gift- Kum 2 (two) a ding in ₹. 2,000/-
- (iv). Encourager- Kum 1 (one) a ding in ₹. 1,000/-

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, ccpur**

**CIF nos: 86412486695**

**IFSC nos: SBINOO06182.**

.....xXx.....